

# Betg ina vusch per la nova taxa turistica

Di da partida da la Partida populara svizra dal Grischun

DA GION NUTEGN STGIER/ANR

■ **In cler «na» per la taxa turistica unificada vegn da la Partida populara svizra dal Grischun (pps). Quai han ils delegads e las delegadas decidì a Tavau. Tranter ils 200 preschents al di da partida cun Ueli Maurer er il cusseglier federal da la pps.** L'atun envida la pps grischuna adina lur commembers e lur commembras ad in di da partida. Sco

gia tar ils ultims dis da partida è l'interess per quella occurrenza danovamain stà fitg grond. Preschentans en la sala da l'hotel Morosani a Tavau eran sonda passada 200 personas. Attratg l'interess da tants commembers e tantas commembras blers simpatisants da la pps ha natiralmain la preschientscha da cusseglier federal Ueli Maurer. Il schef dal departement da sport ha lura er tegnì in referat tar il project «Olimpia 2022» en il Gri-

schun e ditg quant impurtant ch'in tal event saja betg mo per il futur dal turissem grischun, mabain er per il turissem svizzer. La Svizra haja quella pussaivladad da mussar ch'ella sapia realisar ina tala occurrenza sportiva senza gigantissem, ha ditg Ueli Maurer. Quai che pertutga ils custs ha il cusseglier federal ditg che per ils proxims tschintg onns en-grevgian quels il preventiv federal be per 0,28% e sajan uschia supportabels.

## Referat da Gian Gilli

Giast da la pps da noss chantun è er stà Gian Gilli, il directur «Olimpia Grischun 2022». Schanzas e riscos per il Grischun èn stads ils temas centrals da ses referat. A pled è dentant er vegnì Ernst Wyrsh, che daventa il nov president dals hoteliers grischuns il mez da schaner 2013. San gieus olimpics esser in colp da liberaziun? Quai è stà il tema da ses referat. Suenter ils divers referats è vegnì debattà per e cunter gieus olimpics en noss chantun. A la discussiun al podium èn sa participads cusseglier federal Ueli Maurer, Therry Brunner, anteriur snowboardist, cussegliera naziunala Silva Semadeni, Ernst Wyrsh, represchentant da l'economia, Gian Gilli, Swiss Olympic ed Ambrosi Hoffmann, anteriur skiuinz.

L'antierur moderatur da sport Victor Rohner ha manà la discussiun. Grazia a las bunas dumondas dal public ed a las bunas respostas saja stà pussia-vel per tuts da far ina opiniun fundamentala positiva per gieus olimpics en noss chantun, scriva la pps en ina comunicaziun da pressa. Heinz Brand, il president da la pps grischuna ha ditg ch'el spera ch'il suveran da noss chantun sustegna il project dals gieus olimpics en igl Grischun e procura uschia per in futur positiv per l'economia e per il turissem. Suenter ils dus referats da deputà Marcus Caduff (pcd) per la taxa unificada e deputà Jan Koch (pps) cunter quella, han ils delegads decidì cun 137:0 da betg sustegnair quella nova taxa turistica. Refusada vegn dentant er la midada da lescha davart epidemias d'animals che vegn en votaziun ils 25 da november 2012.



Prominentas personas tar la discussiun al podium da la pps grischuna tar il tema gieus olimpics an noss chantun. (da san.) Ernst Wyrsh, Therry Brunner, Ueli Maurer, Victor Rohner, Silva Semadeni, Ambrosi Hoffmann e Gian Gilli.